

蕪水縣志卷之二

知蕪水縣事多祺纂輯

地理志

山水

古者左圖右史以備參稽蓋披圖而名山大川瞭如指掌後世圖經間闕不詳記其方里縷識其源流考古者奚憑徵信如隋史之注石鼓浞賴以明酈注之紀五洲軌得以著山水所關亦綦重矣  
山 巖崖等類附

蕪水縣志

卷之二

山水

治東曰古烟籠山

一里曰玉臺山枕郭面溪遠峰送翠近碧環漪值春

夏巨漲則溪流如吼澎湃之勢頗覺改觀

邑書院即建此山之

巖院側有春曉亭舊為刑部郎楊繼經建旋毀乾隆二十三年知縣邵應龍率邑紳士重建

二里曰鳳棲山世傳張道陵煉丹者三丹成雞食其

一化鳳棲此因名今石上有鳳棲二字明崇禎間理

院熊文燦構關廟於其上會邑數災形家言不便因

毀焉下有陸羽泉

曰鉢盂山



七里曰烟籠山

八里曰雞公山洪武初有大蛇赤冠似雞生兩翼作雞鳴則雨鄉人以爲神祠祀之

九里曰茅廬山

二十里曰田家山

曰密峰山舊志作密峯山上有仙女廟又名仙女山亦邑東南之望也

二十五里曰土陂山

四十里曰金谷山

新水縣志

卷之二

山水

二

曰道觀山山之西舊有桂花園係瓊州守方崇哲落籍處

五十里曰斑竹山

曰太平山

曰斗方山形方如斗端峙巍然爲東北諸峯之望石嶮卽出其下其山通體皆石嵌空硤砢猗猗萬狀

六十里曰三角山秀挿雲表擅邑東南之勝

七十里曰望江山

曰分金山



日月山與斗方山對峙

曰查兒山

百里曰大羅浮山舊志云真人劉五劉六飛昇於此  
有仙人臺臺有石洞有石壁壁如畫龍狀拂之無痕  
滴水淙淙流為潭蓋滙蘄源水以注於河

治東南十里曰花山

三十里曰峨嵋山又名徐家山

曰黃龍山今名官家山

三十五里曰張家山

蘄水縣志

卷之二

山水

三

治南一里曰登瀛山為學宮向山

十里曰天馬山

曰葛公山上有葛仙祠

十五里曰袁家山

十八里曰石龍山

二十里曰分流山

曰楫柑山舊志云有大石如蓮花傳為伍員劍跡

三十里曰蔣家山

曰燈籠山 曰馬頭山



三十五里曰月子山

治西南三里曰雨標山崇禎二年邑令李大受建浮屠於其上未成邑令李汝燦終其事

二十里曰閣黎山舊志云李氏先祖居此

二十五里曰歸公山 曰大旺山

三十里曰倒牛山

三十五里曰萬家山

附記前任蘭谿巡檢胡名籍在任年月無攷卒葬此山任姓地內一女附葬塚旁又前任蘭谿巡檢劉啟選籍無攷康熙三十五年任卒葬胡塚前一女葬地岸上其妻葬侯家嶺有罰捐李姓馬料灣

蕪水縣志

卷之二 山水

四

地一廛二分半經蘭司李士梧詳縣為每年祭祀修理之費

三十五里曰蓮花山 曰龍泉山

四十五里曰板橋山

曰白羊山有石如羊

曰鹿嘶山

曰呂家山

五十里曰仙臺山

治西曰白虎山俗名豬頭山

二十一里曰白荆山綿亘邑西望之如屏湔水東注



山足障之乃曲而南也

曰玉鏡山又名圓壁山山有圓石如月側倚石崖今名月石

二十五里曰寶陀山

三十里曰孟家山

三十一里曰烟籠山

三十五里曰城山盤踞巍峩以上有孫吳土城舊址故名中寬平有田數畝可耕有古蹟見後其山側南一里曰劄馬山

蕪水縣志

卷之二

山水

五

三十五里曰大卓旗山聳秀出羣山之上

曰小卓旗山

三十里曰眠燾山舊志作兔刀山

曰騎龍山 曰揚旂山

曰鳳凰山

曰卓面山

四十里曰調軍山襟湖帶江每春秋登眺煙洲沙嶼江南勝景盡收指顧間

曰太子山自城山一帶數十里皆孫吳屯駐處土人



每掘得昔年兵器廟祀皆吳君臣遺像

治西北二十五里曰分伙山俗名豐虎

三十里曰猴王坪山上有廢寨

曰冷水山

曰望花山

四十里曰張帽山

曰落架山

曰佛陀山

曰王宿山

蕪水縣志

卷之二

山水

六

曰梅梓山上有剪雲閣秀聳西北黃岡麻城羣峯歷歷在目

曰石佛山舊志云有石如蓮一石如佛坐其上

四十五里曰游洪山

六十里曰石門山舊志云峭壁臨河山下有潭相傳潭中有石門尋之而入其地高敞可列函丈

六十五里曰金鼓山舊志云西麓有陶穀學士墓今名陶家坊多陶姓

七十里曰華埠山舊志云峯巒秀小羣景洞豁南有



石丈塢西控長川卽華埠潭

九十里曰華桂山舊志云山有寺唐元宗賜名

治北曰蓮花山上有龐安常廟

一里曰兩山

三里曰茶山舊志云出茶唐劉禹錫詩云松花滿椀  
試新茶

十里曰拔爐山

曰護山卽白石山綿亘迤邐岡巒遞湧爲邑屏嶂產  
石雖白粗硬無用山家云斲之來脈實鐘於此故今

斲水縣志

卷之二 山水

七

採石者不致意焉

曰叢山

曰策山

十五里曰石鼓山山有巨石如鼓叩之有聲見隋書

地理志

二十五里曰恩山

曰婁紫山

三十里曰游洪山

四十里曰小營山舊志云古蘆塘地有土竈徑廣丈



餘

曰楊家山舊志云楊興三興九居此

四十五里曰野鶴山舊志云上有古刹

五十里曰小靈山

六十里曰大靈山

曰邵藤山舊志云晉王烈遊此明王燾居此

六十里曰雲霧山

六十五里曰鸚鵡山

七十里曰四望山

蕪水縣志

卷之二

山水

八

曰周羅山

曰神保山

治東北四十五里曰靈霧山俗名麻母山

曰金繡山

曰金寶山

六十里曰羊角山舊志云山絕峻如羊角

以上蘇志原板

治東紫微山距城三十里上有華鄧二真官觀旱禱輒

應

金谷山距城四十里高峯秀起周氏環居四旁建祠



於山之東麓南有小金山夕陽返照地若希金東爲  
大王廟神最靈近居有強梁凌虐人者稱大王怖之  
輒止

治西城山距縣城三十五里孫吳土城故址有醒酒石  
詳載舊志東門外有石鐫雲起處三字明易之楨書  
蓮花石溝石壁刊鳶飛魚躍四字相傳爲張桓侯作  
北門內有幻居菴西南隅有觀音寺明時王三達因  
城址築寨以避流寇同治五年王鴻業奉諭築堡又  
因三達舊址累石爲壘並捐祖田爲公基聽人築宇

新水縣志

卷之二

山水

九

六年二月粵匪竄境協力防堵督撫以急公好義額  
旌其門

治西北督軍山距城二十五里山勢坦平眾山四面環  
繞咸豐戊午 曾爵相駐於此因名

治北得勝山距城十里舊名月山與拔樓山接壤咸豐  
丁巳 胡文忠公勦髮逆至此山結營大捷追奔數  
十里殲滅殆盡今更名

流泗山距城五十里山上有廟建自宋時門額有流  
泗山廟四字及廟內奠鎮中央匾繫邑先賢徐曲辰



書尚存

石洞山舊名落駕山康熙間土人建觀音洞更今名  
有石室石佛石獅石塔石巖石泉石鏡石鐘及遊僧  
達朗偈石刻

工棋山在洙泗橋北六里凡九峯中峯有石成天然  
棋局故名工棋一云弓棋以山狀也一云丟旂謂昔  
有軍北於此

落蘇腦距縣治六十里相傳蘇長公至蘄嘗憩此山  
四圍皆峭壁東隅一石屹立數丈有蝌蚪文字苔蝕

蘄水縣志

卷之二

山水

十

不可辨旁附圓石如鼓叩之有聲按蘇公謫黃至蘄  
與邑人龐安常來往俱見三蘇集中山得名賢而生  
色故謹志之

嶺

治東八里曰樸樹嶺

曰吳道人嶺

三十里曰虎踞嶺

曰欖兒嶺

治西二十五里曰父子嶺



治西北十五里曰角兒嶺

三十里曰烏沙嶺

治北五里曰長嶺

四十里曰白沙嶺

以上蘇志原板

治東北大嶺距城十五

其巔為策山寨寨下數十武

橫互一山為嶺嶺間有涼亭為往來行人憩息所

巖

治東二十里曰蜜蜂巖

三十里曰滴水巖一在此六十里

山水

十一

蕪水縣志

卷之二

四十里曰清風巖

五十里曰觀音巖

治西三十里曰鴻石巖舊志云往來之鴻棲此

治北十五里曰君子巖舊志云在石鼓山有石椀石臼

六十里曰潘家巖

以上蘇志原板

龍頭巖在三角尖之東入山必於此尋徑其中石泉

振響山鳥時鳴雜樹垂陰諸峯羅列明季毛策二公

隱此卒後居人為立廟今尙存

治南蜜蜂巖距城三十里聳峙雜山中為宋時劉仙女



得道處巖半有蜂洞旁有天竇泉水最清冽遇旱居民奉仙女像禱雨每味爽神蜂飛集壇所金光爛如聲細碎可辨山下里許有龍湫祈雨取水輒應

洞

治東一里曰神仙洞內有石牀石臺卽張道陵修煉處五十里曰羅漢洞在斗方山洞內有古鐵羅漢像

曰百合洞在斗方山巖石壘砌中空透顛節節有穴可入

以上蘇志原板

石雲洞距城二十五里飛虎山側俗呼茅菴邑先達

蕪水縣志

卷之二

山水

十二

徐本僊解官後棲遯於此石牀石枕至今猶存洞下有石龍井頭角崢嶸隱隱若風雲擁護最上有太上宮石壁鐫鳶飛魚躍四字每字徑數尺右側有次士閣土人呼爲八方亭僊姪立朝摹刊忠孝廉節四字於石壁間

岡

治東北三里曰望城岡

二十里曰走馬岡

石



治城南曰迴瀾石在城址下有古蹟見後

其下一里溪南岸曰打鼓石石高數丈鼓之聲輒應  
故名有古蹟見後

曰沂流光石阜城門外濱河有古蹟見後

曰鳳棲石城北鳳棲山石上有隸書小銘

治西二十里曰曬穀石

曰豹兒石又名抱兒石以大石抱小石云

曰太公石在河中邑謝神童有詩云一片漫鳥石中  
流在此間世人推不去畱與太公眠明立義士李清

山水

十三

蘄水縣志

卷之二

七清人之祠於其上

三十里曰花膏石石磷磷如花膏

曰鉢孟石斗方山左

曰分金石斗方山羅漢洞側

治北四十里曰馬踏石上有馬蹄痕傳有天馬昇此今  
有東嶽祠玉帝閣

曰響鼓石太平寺側

水 湖港等類附

江自黃岡界東逕巴河鎮巴水注之又東二十里逕楊



林港港水注之又東十里逕蘭谿鎮浣水注之又東十五里逕迴風磯又東十里逕散花洲之唐家渡入蘄州界

浣水卽城南門河源英山界河達雞鳴河出呂家口左則夫子河右則古河抵石嶮下百里河西逕五里右則吳家柴水注之又西十里蔡家河水注之又西五里柴家河水注之又五里關口水注之左則王道士坳水注之又西逕六里右則畢家港水注之又西五里螭嶺水注之又西南十五里綠楊橋水注之左則

蘄水縣志

卷之二

山水

十四

王家河烏沙港水注之右則城東濠水注之又二里城西濠水注之又五里黃鳳港水注之左則翟家港水注之又西五里右則磨兒橋水注之又五里易家河水注之又五里游心港水注之花膏石水注之又西逕霖潭右則黃河湖水注之左則張角灣水注之又西五里青蒿港水注之又西逕五里右則金家灘左逕蘭谿鎮入於江其水西流劉宋立浣水縣以此名舊志蘭谿水源出苦竹山其側多蘭唐因此名縣今按蘭谿卽浣水出口處巴水源羅田縣之鹽堆山與石柱山二水交會出中界



河西逕十里左則鳥鵲杯諸水注之又西逕十五里  
尤河渡團陂之水注之又西逕十里右則黃岡段店  
倒橋河水注之又西十五里逕金家渡又西逕二十  
里左則何家寨激水山之水注之又西南二十里黃  
岡之上巴河市元潭港與小河口之水自東入焉又  
南二十里逕龍家渡又西十里明家洲沙港頭之水  
入焉又南逕十五里桃花潭爲西陽河又南十五里  
至巴河鎮入於江今名下巴河

蘄水自英山界河上接蘄州界下入鷄鳴河左由查兒

蘄水縣志

卷之二

山水

五

山接三角山水流西南十五里至蘄陽坪河三角山  
之水注焉又十餘里出洗馬畝河又二十里至白石  
頭萊蘄州之株林河水入焉自是歷五十餘里盡蘄  
州界入於江

治東五里曰泊港河

八里曰曹家河

十里曰樊家河

二十里曰百師河

三十二里曰閻家河



四十里曰倒流河

四十五里曰白蓮河

五十里曰沙河

曰蘄陽坪河

六十里曰蔡家河

治南八里曰羅家河

四十里曰分流河

治西七十里曰西陽河俗名新樣河即西陽古治也

治北四十里曰洙泗河

蘄水縣志

卷之二

山水

六

曰柴家河

曰史家河

曰童家河

六十里曰上巴河

九十里曰尤河舊志云明正德七年閏五月流賊劉

六劉七齊彥名等為官軍所敗遁走經此

以上蘇志原板

張新宇河即古蘄水明張新宇等建橋其上因以人

名

湖



治南六里曰阜泥湖

治西南十里曰綦家湖

十五里曰彭家湖

二十五里曰薛家湖明成祖賜薛均因名又名欽賜湖見古蹟

曰毛家湖

三十七里曰藩司湖

三十八里曰左家湖

四十里曰黃草湖

蘄水縣志

卷之二

山水

十七

曰後湖

曰楊歷湖

五十里曰拆湖今據邑胡氏家譜胡氏世居湖上地名赤水里疑此名赤湖或赤拆音近拆當為赤之譌也新郡志改為圻湖無所據

七十里曰攝湖舊志云雷攝永樂寺塔三層於此因名

治西三里曰山洋湖

十里曰荷蕩湖今入書院名官湖



四十里曰黃沔湖

四十五里曰官田湖

曰袁家湖

五十里曰魯家湖

曰蔡家湖

六十里曰望天湖

曰周家湖

曰芝麻湖

曰陸家湖

蘄水縣志

卷之二

山水

十八

七十里曰董家湖

曰協湖 以上蘇志原板

黃滅湖治西四十里俗傳以黃巢滅此故名又云近

湖有雪庵僧鈐記說俱不經舊志作黃沔湖當以水

渾色黃常溢不涸取象黃河沔彼流水之義黃言其

色沔言其形於文理較妥

港

治東十里曰紫埠港

二十里曰烏沙港



曰馬潮港

治南十五里曰青石港

二十里曰杜家港

四十里曰分流港

治西南五里曰鹿叫港

曰翟家港

十五里曰彭家港

二十里曰六神港

三十八里曰青蒿港

蕪水縣志

卷之二

山水

治西四里曰黃鳳港

十五里曰麻橋港

三十里曰茅店港

三十五里曰苦竹港

四十里曰官橋港

治北十五里曰萬花港

曰金橋港

三十里曰清水港

曰太平港俗名划船港



四十里曰官港

七十里曰樊家港

以上蘇志

鳳凰港治北五十里長塘村有一家燕巢於堂窠以百計居中一窠最闊雛亦較大尋成三鳳飛去故港與山堰皆以鳳凰名

堰

治西北六里曰胡可堰

治南鄉曰曹家堰

曰官陂堰

蘄水縣志

卷之二

山水

二十

曰義門堰

治北鄉曰袁家堰

治下鄉曰胡師堰

曰慈菰堰

薛家湖尾曰段家堰

黃草湖尾曰李家堰

潭

治南一里曰龍潭有石壁立下有深潭

治西三十五里亦曰龍潭月子山側上有龍女祠



曰溪潭又名霖潭

治西北七十里曰桃花潭舊志云相傳有龍居焉昔有捕魚者循而入與龍近亦不相害移十數日突得出兩腋間已隱隱生鱗甲矣土人言之不知爲何時事

曰華埠潭

陂

治東二里曰鴨子陂

治北三十里曰飲馬陂

七十里曰團陂

蘄水縣志

卷之二

山水

洲

治東六十里曰散花洲詳古蹟

治西四十里曰伍洲詳古蹟

曰新洲在大江中與蘭溪對

塘

治東曰聯塘在昭化寺前

十里曰月塘

曰聖人塘

治西十五里曰藕塘



五十五里曰泉塘

池

治東一里曰洗墨池詳古蹟

治北曰蓮花池在縣署後官地今爲民堙

泉

治東二里曰陸羽泉詳古蹟

治西三十五里曰龍泉在龍泉山側

四十里曰天下第三泉詳古蹟

井

蕪水縣志

卷之二

山水

三

治東曰義井傳漢壽亭侯淬劍於此

曰三眼井

一里曰張道陵丹井昔煉丹於此今在神光觀側一

統志云此水能解熱疾

曰伍員井見後古蹟

二里曰清泉井在清泉寺前池中唐貞元間鑿井得

泉清冽因以名寺源與河通寺僧每以水之清濁卜

天之晴雨焉

二十里曰大水井



六十里曰老龍井

治西曰向家井

治北曰便民井拱辰門外因便於民故名之其石圍志  
曰崇正四年辛未居士黎君極重修

五十里曰泠水井

治東三角山曰老龍井邑旱則取水禱雨輒應

磯

治西五十五里曰迴風磯

嶮

蘄水縣志

卷之二

山水

三

治東北六十里曰石嶮石梁橫截河中飛泉瀑布有聲

古蹟

棠茭勿翦秋水興思君子尋其跡想見其為人蘄水  
東南之會得清遠之奇晉唐名賢往往過之而廢壘  
殘屯滅沒於荒煙蔓草者典故有稽矣後之覽者所  
謂存什一於千百奚啻韓陵一片石乎

軌縣廢城在西南四十里按水經注城南對伍洲漢縣  
惠帝封長沙相黎朱蒼為侯國劉宋孝武帝自此討  
元凶邵改軌為孝甯齊因之後周廢

本郡志



蘄陽廢城傳爲晉宋間之蘄陽縣後來改併不時而故址在蘄陽坪土人嘗於其地掘得巨甕甕之屬云昔之城垣也

巴河廢城明崇禎十三年間相國姚明恭因流寇亂築城團練於巴鎮未幾圯廢今尚有文瀾門城門口箭樓口之名

關口舊縣墟距治三十里許不知起廢何代今猶有舊縣畷之名有月明山刹相傳古城隍廟在焉

黃城鎮治東南五十里抵蘄州界有古刹黃城殿傳自

蘄水縣志

卷之二

古蹟

三

宋高宗南渡曾駐蹕此殿後土人易爲東嶽府遂名黃城至今廟後有古松亭亭霜皮溜雨偃若虬龍非近物也

筆沼距郭東二里許相傳王右軍洗筆於此今池畔小竹猶皆漬墨痕又廣輿記載江西臨川縣亦有右軍墨沼按右軍本傳晚年不競榮祿雅尙林泉盡東南之勝遇山水佳處輒索筆作書此兩墨池固無疑矣近邑諸右姓於其旁構祠以祀 朱子

綠楊橋以蘇子瞻解鞍敲枕句得名今其遺址在郭東



里許岸分兩麓溪流南繞水漲則巨浸通橋水落則  
白沙耀日於月猶宜自北有小溪貫橋中石齒磷磷  
雖綠楊非昔而芳草依然可想見其醉吟時也詞載  
藝文志

天下第三泉在治西南四十里蘭谿鎮東數里南嶽廟  
後明萬厯間邑令游王廷刻石往來遊者皆有詩今  
堙塞按三泉之名本唐張又新煎茶水記云得之楚  
僧煮茶記謂代宗朝李季卿刺湖州至維揚逢陸鴻  
漸處士所筆記次第曰蘄州蘭谿石下水第三乃二

蘄水縣志

卷之二

古蹟

二十五

十水中之一也洎宋歐陽永叔作大明浮槎水記俱  
云又新所記與茶經相反或妄附益之歐蓋以張之  
人不足與故斥之然永叔本茶經論水云山水上江  
水次井水下又云山水乳泉石池漫流者上舊志注  
潭有乳泉津津漫出則此泉宜爲羽取不得以又新  
之人而輕棄此泉也惜永叔未親至蘭谿而試之郭  
東鳳樓山下泉亦羽烹茶處舊志載有茶泉亭大梁  
卓世彥建今圯

城南有石麓橫抵河流上有激湍二字舊志云東坡所



鐫明成化間邑令潘珏建迴瀾亭於其上後亭廢不  
數步有巨碑刻鳶飛魚躍字徑一尺餘云王右軍書  
後斷碑半沒於河僅魚躍二字移值學宮櫺星門右  
乾隆二十三年知縣邵應龍重建以復舊觀今又圯  
溪南岸有潭曰龍潭潭側石壁立鼓之聲輒應名打鼓  
石相傳東坡泛月於此鐫擊空明三字於石又西去  
對岸石上鐫泝流光三字舊皆有亭爲大梁卓世彥  
所建蓋本赤壁賦中語也明時邑人胡仲謨書繼蘇  
二字於石太常官應震構間雲樓於其上今廢

古蹟

靳水縣志

卷之二

二十五

豐嶂亭見一統志東坡所名今廢據舊志云溪南文昌  
閣爲蘇公亭舊址

四望亭據一統志云有二一在府治東雪堂南唐太和  
中刺史劉嗣之建李紳曾作有記一在縣屬斗方寺  
後

葛公山治南十里相傳晉葛洪隱處

城山治西三十五里吳孫權土城故址今有吳王廟山  
陰有石鐫雲起處三大字每字徑三尺餘不記書者  
姓名年代又邑人何彬然題醒酒石有詩見藝文志



薛家湖治西南二十五里明成祖知薛均貧甚命有司給官湖頃餘爲贍養資又名欽賜湖

巴口卽巴河口南齊東昏侯遣十三軍拒蕭衍所進屯處

伍洲在縣西南四十里大江中一統志謂伍員適吳過此因名按水經注作五洲以洲五相連故名宋孝武舉兵江洲建牙其上紫雲廕之卽此

散花洲在縣西南六十里三國時周瑜破曹操犒士於此

蕪水縣志

卷之二

古蹟

二十七

伍員井在治西一統志云伍子胥適吳過此淬劍

附記

浣川八景曰迴瀾卽迴瀾石又蘭谿江濱亦有此亭

曰綠楊橋曰龍潭曰丹井曰洗筆池曰茶泉曰蘭谿

曰鳳山

舊志謂始於王元之詠浣上八景云

又更定浣川八景曰空明水石曰川上流光曰澄潭

網集曰清泉梵響曰三角雲開曰浣源峻險曰三泉

異味曰仙臺藥茂

舊志謂邑人黃正色因王元之所詠八景亂後有頽廢者故改定之

又浣川十二勝迹曰羲之筆沼曰陸羽茶泉曰葛洪



精舍曰道陵仙洞曰周瑜花洲曰孫權城址曰壽亭  
義井曰元宗寺額曰蘇子綠橋曰伍員劍石曰佛印  
斗方曰虎師三角

舊志謂各以一人得名因總著之以徵實

又巴河四景曰爐山春日即今火爐嶺曰棗林夏風  
即今萬壽寺側多棗樹今尚存曰石潭秋月即今石  
潭曰孤嶺冬松即今文昌閣下仰天窩有古松今毀  
舊志云始於蘇東坡所定然蘇無詩記以傳之則亦未確也

### 風俗

溫公謂風俗之善惡繫於習染夫風流於上俗成於

## 蘄水縣志

### 卷之二

風俗

二十六

下古者太史所陳以識貞淫之別抑士爲四民之首  
而不之鶴者匪細也蘄本節儉而務勤勞顧樂利優  
游文將不免記曰國奢示之以儉國儉示之以禮夫  
亦操之有道歟

宋關詠神光觀記曰蘄西氓俗富庶秀民樂於爲儒而  
不輕釋其業彬彬喜學有鄒魯遺風

蘇軾與陳季常書曰蘄水溪山乃爾秀邃

秦觀代蘄守謝上表曰風氣和平訟獄稀少

明王鏊重修學記曰文藻淵源簪纓聯續



通志蘄水善田事勤女紅富人尤多畏法

右前所陳大較可觀矣時會遷流而不離其本若民風土習婚喪葬祭之儀日用飲食之質問俗者不厭其瑣也約舊志述之

邑中多瘠田故當春初農人皆取塘泥以壅之力多則穫多力少則穫少清明後布穀或早或中遲異種及栽秧東西隣易力助工擊鼓作歌以相督及秋乃穫近巴河一區歲再穫餘惟一穫稼事畢隨播秋襍泥豆蕎麥蘿蔔油菜大小麥之類以次播收土著之利

蘄水縣志

卷之二

風俗

二十九

略見於是矣

邑西南當江湖之濱田頗窪下每遇水溢之歲則淹浸隨之東北壤近山麓其地易乾值歲旱則戶集桔槔車塘堰水以救甚且數車轉激逆度高原以灌注烈日赤日中雖婦女亦與至於旱甚水竭雖低下亦不可救矣

每歲暮春鄉人間治蠶事亦有節目其初風種始生則以鷺羽拂之既食則剉桑葉風戾以食之歷初眠再眠至於大起分箔登簇采繭繅絲蓋辛苦者三十餘



晝夜矣取絲無幾持而向市易之得一金則欣欣色喜或有小故爲猾者所攫不能易一殮也新絲新穀之謠可弗聽歟

入夏於地之爽塏者多植棉花七月既望以後從而拾之紡而織之以爲布機杼聲相聞抑且貿之以輸正供此貧家婦工之常業也

邑西南一帶居民近江湖得水族之性故多善魚而取魚之具爲網爲罾爲釣爲罟爲箔之類不一其用爲鮮爲鮓爲鱮爲醃魚爲乾魚濱江之民取焉邑及鄉

蘄水縣志

卷之二

風俗

三十

人販而買焉資其利以給衣食者蓋十之一二矣

邑人重去其鄉離家百里則有難色非公差仕宦不遠遊惟巴蘭近水少有商賈餘悉業農農雖最勤然習安焉不之怨也其無田而佃人之田者曰佃戶亦有饒者最貧則爲人傭工或計歲計日而受值焉又少隙則或捕魚鰕采薪貿易不肯稍休

兩鎮濱江帆檣雲集巴河尤當水陸之衝遠方之貨亦盈溢矣然習氣稍靡而牙儈或蠹則商民兩病焉

邑多衣冠之緒以孝友爲本詩書爲業其樸茂近古而



風氣亦漸開也騷雅文會之興蓋駸駸歟

議婚率以門楣爲重始通媒妁男家惟用金裝雙封媵啓女家答啓遂定山盟矣六禮雖不具備其納采請期親迎猶遵行焉聘資菽奩稱家盈縮或有論財寒盟者雖細人弗爲也

治喪親始沒訃於戚友沐浴殮畢殯於中堂家人裂布裹頭三日用牲堂奠成服齊衰期功緦麻各以等外親往弔亦裂布以稱免焉凡涕泣杖踊飢粥苦出之節蓋秉禮者不違也然用鼓吹崇佛事舊志不已譏

### 蕪水縣志

### 卷之二

風俗

三十一

之歟

擇地營葬多信形家言有年遠不葬者及葬多用鼓樂導送如治喪惟無力者則否

春秋二祭庶人祭於墓士大夫立廟者祭於廟餘四時節序父母生忌奠於寢其祭廟也具牲醴辨昭穆序長幼執爵以族長奉祖先主列木龕潔豆薦歆讀祝焚楮幣祭畢燕飲分胙而退凡祠有產族有譜

元旦陳臘炬柏酒辛盤爆竹開門家人親戚里黨更相

慶賀讌飲



元宵作燈市市中張棚列架綴燈火甚繁或高起花爆  
曰烟火山農以炬照田驅害稼贏蟲迎紫姑神占休  
咎

立春大令督坊甲塑土牛先一日率僚屬迎春東郊鼓  
仗喧闐觀者充溢鄉人以牛色卜水旱以芒神戴攜  
卜寒暖

春社鄉民釀錢市牲醴禮土神祭畢羣飲盡歡而罷真  
有桑柘影斜扶歸醉人之樂也

清明日埽墓男女簪新柳是月也鄉人作茸餅俗名輓

蕲水縣志

卷之二

風俗

三十二

麩

三月二十八日俗謂東嶽誕辰演劇設醮累十日

四月八日僧尼浴佛供青精飯塾童子放假引風鳶以  
為戲

五月五日端午節以青箬裹角黍相饋遺插艾飲菖蒲  
雄黃酒小兒用塗眉額辟惡也以綵絲繫臂謂之長  
命線邑與巴蘭皆競渡以弔屈原

自十一日起為 關帝會為 張王會至十八日為送  
船會至二十八日為 城隍誕辰會城隍會則邑中



獨也餘會巴蘭俱有之而巴更爲甚蓋皆演臺閣故事以慶之費金錢糜酒食雖貧民不避焉謂以致力於神也楚俗之好巫重鬼信乎當思所以革之  
六月六日俗以爲半年福頗重之

七月七夕家設瓜果酒穀於庭乞巧會談牛女渡河事  
十五日中元節家各焚楮錢薦祖考新亡之家饋送尤多僧舍建盂蘭盆會

八月中秋節家具菱藕大餅爲賞月之讌

秋社祀神飲酒如春又五鄉俱演劇報賽曰黃穀風蓋

蘄水縣志

卷之二

風俗

三十三

自是訖於冬焉

九月九日重陽節是日祀祖如清明是月民間多釀酒具雞黍邀比隣族黨爲歡云新米酒

十月十一月農民自田及佃田者皆挑糧米上倉曰完火米完倉後則呼同儕沽飲歡醉而歌祝之又佃田者以銀完田主曰儘銀兩事畢則一家安樂預備春耕矣

十二月二十四日小除是日掃屋塵曰除殘是夕祀竈至除夕復祀之曰接竈



三十日爲除夕張春帖子於門合家長幼畢聚團飲盡  
歡曰談年是月自小除後必卜日具酒醴牲品祀其  
始祖以下及親祖父及伯叔祖父及昆弟子孫之殤  
者曰羹飯蓋猶古臘祭之遺姻親往來多以魚臠糕  
果相贈謂之餽歲辭歲是夕饒鼓喧聲達旦又謂之  
守歲焉

夫風俗者各限於天地之氣而聖王涵濡之以教司  
牧者扶翼之以政其鄉老前輩又倡率薰染之以詩  
書禮樂故善也蘄之俗向也寡而今也庶向也樸而

蘄水縣志

卷之二

風俗

三十四

今也華蓋幾於善矣夫其已善者則修其教不易其  
俗齊其政不易其宜而猶有未逮趨之則波於時也  
而挽之實臻於古矣

塋墓

桓山石鏹不如速朽墓何志也志之以爲不朽也必  
有所以不朽者存焉斯柳下之樵有禁而季子之碑  
用題與

明

漳國公王聰墓在縣西南司家畝招魂敕葬



戶部尙書楊思義墓在黃草湖敕葬

清流知縣呂鏞墓在長嶺岡

錦衣衛署都督僉事文質墓在縣北

遵閩志舊本改正劉志塋墓云武狀元文質墓又武功烈傳云文質嘉靖間人善騎射有異材由武狀元任錦衣衛都督子應詔由武進士任錦衣衛都指揮僉事父子二人一諡昭義一諡昭勇歷數百年以武狀元顯而父子叨國諡蓋亦僅焉右兩段載記如此考明史選舉志武科殿試賜甲自崇禎四年用方逢

蘄水縣志

卷之二

塋墓

三五

年倪元璐議始行乃賜王來聘等及第出身有差來聘本傳云武榜有狀元自來聘始也再昭義昭勇亦爲封爵之號非諡也其武功又未指著事蹟劉志諸如此疎誤故不敢仍其傳特存其墓因附辨於此云副總兵鄧祖禹墓在鄧氏先隴

黃岡翰林院檢討王用予墓在巴河鎮鳳城觀之左山麓

蕪湖知縣黃正色墓在馬鋪衝

池州府知事署東流知縣程九萬墓在白石山



黃岡隱士王一翁墓在巴河鳳山

國朝

會稽知縣贈按察司僉事官撫渙未歸葬墓在餘姚  
寓隱何白雲墓在何廟鋪後山

歐烈女墓在魯家湖西岸山

原劉志所載有學士陳仙誥墓失其地學士陶穀墓  
在金鼓山高丞相墓在治北六十里考閩志舊載陳  
墓已注弗詳若陶若高則閩志所未有不知劉志何  
據增入也今按陳高俱不見正史人代莫考矣陶穀

蘄水縣志

卷之二

塋墓

三六

亦未詳何時人新郡志繫之以宋易穀爲穀疑誤而  
劉志藝文中錄陳瑛弔墓詩竟指爲宋陶穀此郡志  
之所以誤與考宋史陶穀邠州新平人開寶三年以  
禮部尙書卒於官其墓當不在此或此名穀非穀也  
附

萬人塚在縣河南岸崇禎十六年城陷枯骨橫野有  
僧拾之知縣孔維時令葬於此

蘄水義園在都中崇文門外五里許地名神樹有義  
園大字石碑高五尺餘前明邑紳以葬邑人之貧而



客死者有屋三間守園者居之有棗樹七十二株付  
守園人禁蓄收租每值會試年在館諸公共釀錢備  
僱雇車詣園致祭有餘錢則給守園之人踵而行之  
庶情敦桑梓存沒不忘是在後之好義者  
以上蘇志原板  
忠義塚在劉家嘴龜山寺後同治甲子賊至居民逃避  
不及溺於習函堰者數十人賊退里人憐而瘞之建  
碑於墓

宋隱士劉平夫婦墓在馬鋪沖右李家灣左山背有劉  
仙女父母墓

新水縣志

卷之二

塋墓

三七

高丞相墓在治北八十里國陂墓碑穹然大書高丞相  
之墓相不詳年代名字

明理院熊文燦墓在治西大河對岸文峯塔東半里許  
碑尚存

明大學士姚明恭祖墓在永福鄉之山洲坪俗呼木星  
地

國朝陳修撰祖墓在姚明恭祖墓木星地右半里許俗  
呼沙虎地

翰林院修撰陳沆墓在治西四十里調軍山



萬人墓在治東六十里長嶺岡之西同治乙丑霍山人  
倪宗元收拾遇難骸骨買山作三塚瘞之植立石碑  
遇時疫流行往禱輒應郭姓施捨基址倪因建廟顏  
曰鍾靈祠

樊孺人墓孺人者前縣尉朱公嫂孺人從叔氏之官沒  
於蘄寄棺城內間雲樓下朱公去後風雨飄搖徐西  
峯量地葬之爲碑以銘葬後三年孺人子宮北平遣  
僕賫萬錢以半卜葬餘與寺僧爲祭掃資貽書邑令  
董其事僕至聞其已葬踵徐道謝徐南墅以巔末勒

蘄水縣志

卷之二

塋墓

三十八

諸石兵燹後碑沒

蘄水義園在都城崇文門外三里許疙疸

音格

樹北人

謂結核爲疙疸樹之拳曲類之故名咸豐同治間同  
人至其地甚屬荒涼舊志載棗樹七十二株付守園  
人蓄禁今無存旁有小屋一區看墳人耕種塋間隙  
地切塋俱墾僅留一墩地基屢被居民侵佔各種亦  
多穿陷辛未春同人醵資買土培墳於園之四面窖  
石爲界並樹立石碑一座然折柳樊圃莫阻狂夫計  
非周圍環以短牆終難免蹂躪每屆會試新榜於四



月初一題名是日往義園公祭大比須待三年旅魂  
纔得一食所望官京師者敦桑梓誼每歲清明寒食  
命館人澆以酒漿暇時親往勘驗一切申飭園丁毋  
任損壞庶前人義舉不至久而就湮矣

蘄水縣志

卷之二

塋墓

三十九



物產

庶物馮生山川以竅而民生日用需之如方貢及於菁茅土風徵諸蟋蟀盡物性也蘄之產同於他土者亦多矣顧嘉種雜穀食其德者服先疇空谷有蘭採其芳者思君子是可彙其類表其時而次第志焉  
通產

五穀之屬多稻多麥多豆有黍有粟

稻之屬多粘有糯有晚 粘之屬曰五十粘 曰六十

粘 曰七十粘 曰得雁紅 以成熟之早晚 曰圓頭粘

蘄水縣志

卷之二 物產

早

曰齊頭粘 曰矮脚黃 曰蓋草粘 曰蝦鬚粘 以形

曰銀條粘 曰金包銀 曰青粘 曰黑壳粘 曰

紅黃毛粘 曰白黃毛粘 曰白鶴粘 以色 曰浙江

粘 以地 曰楊三粘 以人 曰無名粘 曰天降粘 以瑞

糯之屬曰魚子糯 曰馬鬃糯 曰虎皮糯 曰芭

茅糯 曰毬頭糯 曰三粒寸 以形 曰飛上倉 曰

鋪倉底 以早 曰雪黃糯 曰淨田糯 以遲 曰黃金糯

曰烏節糯 以色 曰徽州糯 以地 曰觀音糯 曰童子

糯 以人 晚之屬曰八月晚 以時 曰光頭晚 曰蝦鬚



晚形

曰烏節晚色

曰徽州晚地

曰童子晚人

麥之屬多大麥多小麥

並有早晚二種多蕎麥

豆之屬多黃豆多菜豆有紅豆多泥豆有飯豆多豇豆

多扁豆

白花者佳

有蠶豆有豌豆有刀豆

黍之屬有粘有糯

粟之屬有粘有糯有蘆粟

穀之別屬有脂麻

白黑褐色三種皆可榨油黑色有三楞者即巨勝子

蔬之屬多蕓蕓之屬多水蕓有旱蕓

與水蕓根苗同旱地可種

有

山藥

即薯蕷出田家山者佳

多菜菜之屬多菘多芥多芸薹

俗名

蕓水縣志

卷之二

物產

四十一

油菜其子可榨油

有菠有芹多莧有茗蓬有同蒿有窩苣多

蘿蔔

紅白二種紅者名胡蘿白

多茄有薑多葱多韭多蒜有薤有

大胡椒小茴多馬齒莧多薺菘之屬多箭桿白有烏

風白有黃芽白

寬莖扁葉味甘脆本北產初種殊佳再種度勒

芥之屬多白

芥有火焰芥有茴香芥多瓜瓜之屬多黃瓜多南瓜

多絲瓜有西瓜有東瓜有苦瓜有菜瓜多瓠子

形多長

葫蘆

水蔬之屬有藕

白花者佳

有芡菰有萹蒿有水芹

果之屬多李有杏有梅有桃有櫻桃有林檎有棗有梨

有栗有橘有柿有銀杏有枇杷有石榴有葡萄有蓮



子多菱多芡實有勃薺

藥之屬有黃精有歲蕤有天門冬有麥門冬有枸杞有

地骨皮多荆芥多南星多半夏有何首烏有香附子

有蒼耳子有茱萸有地榆有桔梗有天花粉多青蒿

多香薷多五加皮多芫薺子多夏枯草有旋覆花有

蒲公英有菖蒲多忍冬花多金櫻子多青箱子多車

前子多土牛膝有茵陳有牽牛子有淡竹葉有萆薢

子有薏苡多莞花多紫蘓有薄荷有土茯苓

花之屬有菊有芍藥

有紅紫白三色

多荷有杜鵑有雞冠有鳳

蕪水縣志

卷之二

物產

四三

仙有玉簪多酴醾多薔薇有月季紅有十姊妹有山

丹有美人蕉有葵有罌粟有繡毬有桂有玉蘭有牡

丹

粉紅紫三種

有辛夷有山茶有瑞香有海棠多梔子有

臘梅有木槿有木香有紫荊有夾竹桃多木芙蓉

草之屬有萱有芭蕉有菖蒲有荻有蘆有雁來紅

一名鳳凰

衣又名老更嬌

有游龍多馬蓼有翠屏草有翠雲草有吉祥

草有萬年青有洗手香多茅多虎耳草多狗尾草有

鳳尾草多蒿多萍多藻

木之屬多松有栝有槐有檀多楓

有細葉楓

有梧有桐有樟



多黃楊多楊有柳有構有烏柏其子可榨油有桑有櫟有

皂角有棟有杜仲有棠梨有椿有杉有冬青有蠟樹

春移虫於枝間冬積白垢取煉之為白蠟實為女貞子又有一種名水蠟

竹之屬多篁竹有三月笋四月笋多猫竹多水竹有筋竹有紫

竹有斑竹有苦竹有鳳尾竹有慈竹

羽之屬多雞多鴨有鵝多鴉多鵲有鷓有鷹有雉有慈

鳥大嘴鳥有鳩有鴿多麻鵲有鷓鴣多山鵲紅嘴長尾多

鸚鵡有畫眉有鴛鴦有杜鵑有黃鸝有竹鷄有百舌

有燕有翠多雁有鳧多白鷺有鸛有鴛有鷓有鷓鴣

新水縣志

卷之二

物產

四三

有啄木有鴟一名伯勞有鶴鴒有秧雞有穀雞

獸之屬有馬有牛有騾有驢有羊多豕多狗多猫有虎

有狐有獾有兎有豺有黃狼鼠有野猫有鼠

鱗之屬有鯉有魴多鱖一名鱖多鱗一名鱗頭有鱖有鮎有白

即楊鱈有鯖有鰻有鱒一名草魚有鯊土名聚刀魚有鯨多

鯽多烏鯉有鱒有鱔有鱖有鱖有鱖有白小有黃

鱖有鱖多泥鱖有鰻有江豚

介之屬有鼈有鼉多鼈有龜有蟹有蜆多蝦多螺多蚌

虫之屬有蠶多蚊多蚋多蝨多蜂有蝎多蜈蚣多



蝥蛛有蜻有螳螂有羗螂有蜥蜴有蟾蜍有蛇有蝮  
牛有蜚有蟬有促織有蟋蟀多螢多蚱蜢有紅娘有  
斑蝥多蟻多飛蟻黑白二種多蜻蜒多蚯蚓多蠅  
貨之屬有木棉有苧麻有菜子俱產沿江洲邊  
蘄篔一統志云蘭谿蘄竹所出之地以色瑩者爲篔故  
王介甫詩云蘄水織篔黃金紋蕪子瞻詩云蘭谿美  
箭不成笛離離玉筋排霜脊乃知蘄篔不啻以蘄州  
得名也但竹與匠不及蘄州之多耳

雲霧菇產三角山

蘄水縣志

卷之二

物產

四十四

茶斗方山及人家諸圃皆出

專產

大柑皮厚味甘色若黃金 石耳生石上 百合出山

中一顆數瓣味甚美 山蘭多出山谷中唐以此名

縣東坡清泉寺歌云山下蘭芽短浸溪又杜牧詩云

蘭谿春盡碧泱泱水蘭花雨後香

羅漢菜三角山出舊有異僧種之而去雜以暈膩卽無

味

鐵一統志云蘄水產鐵

